

UGOVOR

o nabavci, isporuci, montaži, instalaciji i o puštanju u rad IP telefonske centrale sa pripadajućom opremom

I UGOVORNE STRANE

1. **Kantonalne uprave civilne zaštite Kantona Sarajevo**, ul. Hamida Dizdara br. 1., Sarajevo, koju zastupa direktor, mr. Mustafa Kovač, (u daljnjem tekstu: **Kupac**), ID broj: 4200665390008 i
2. **MIBO Komunikacije d.o.o. Sarajevo**, ul. Tvornička br. 3., Sarajevo, kojeg zastupa direktor, Marko Boštjančič, (u daljnjem tekstu: **Prodavac**), ID broj: 4200470540005.

U daljnjem tekstu Ugovora, kada se Kupac i Prodavac navode zajednički, tj. zbirno, tada su označeni kao „Ugovorne strane“.

II OSNOV ZA ZAKLJUČENJE UGOVORA

Osnov za zaključenje ovog Ugovora je Odluka o izboru najpovoljnije ponude za nabavku roba, Kupca, broj: 22-44-1392-9/17 od 12.09.2017. godine.

III PREDMET UGOVORA

Član 1.

Predmet ovog Ugovora je nabavka, isporuka, montaža, instalacija, konfiguracija, testiranje i puštanje u rad IP telefonske centrale sa pripadajućom opremom, kao i obuka osoblja Kupca za rad na navedenoj centrali i opremi prema tehničkim specifikacijama, koje su navedene u Tenderskoj dokumentaciji za nabavku roba Kupca, broj: 22-44-1392-2/17 od 30.08.2017. godine, kao i u Ponudi Prodavca, br. 1507/17 od 11.09.2017. godine, koje čine sastavni dio ovog Ugovora.

Član 2.

IP telefonsku centralu, kao i svu pripadajuću opremu (u daljnjem tekstu: roba) koja je ugovorena ovim Ugovorom, Prodavac je dužan isporučiti, montirati i instalirati prema svojoj Ponudi, te po uputstvima Kupca i u skladu sa važećim sa tehničkim propisima, pravilima i standardima.

IV CIJENA I NAČIN PLAĆANJA

Član 3.

Ukupna vrijednost ugovorene robe definisane u članu 1. ovog Ugovora iznosi: 50.299,47 KM (slovima: pedesethiljadadvijestotinedevadesetdevet konvertibilnih maraka i četrdesetsedam feniga).

U ukupnu cijenu iz stava 1. ovog člana, uračunat je PDV.

Cijena je fiksna i ne podliježe nikakvim promjenama za vrijeme trajanja Ugovora.

Kupac se obavezuje da će ukupni iznos iz stava 1. ovog člana isplatiti na račun Prodavca broj: 1401020011330457 otvoren kod SBERBANK BH d.d.

Član 4.

Ugovorne strane su saglasne da će Kupac ukupnu vrijednost iz člana 3. stav 1. ovog Ugovora isplatiti u roku od 30 dana od dana isporuke, montaže, instalacije i puštanja u rad robe, ako prilikom primopredaje Kupac nema primjedbi na isporučenu, montiranu i instaliranu robu.

U slučaju da se prilikom primopredaje robe, konstatuju nedostaci i odstupanja od tehničkih specifikacija datih u Ponudi br. 1507/17 od 11.09.2017. godine, Kupac se obavezuje da će isplatu izvršiti odmah, a najkasnije u roku od 10 dana, nakon što Prodavac otkloni nedostatke konstatovane u Zapisniku o primopredaji roba iz člana 8. stav 1. ovog Ugovora.

Prodavac je saglasan da Kupcu neće zaračunavati zatezne kamate za zakašnjenje pri plaćanju preko „Trezora“, ako je Kupac u ugovorenom roku predao nalog za plaćanje, a Prodavac primio uplatu s odgodom od jednog ili više dana od ugovorenog roka iz stava 1. ovog člana.

V ROK I MJESTO ISPORUKE

Član 5.

Prodavac se obavezuje da će robu iz člana 1. ovog Ugovora, isporučivati, montirati, instalirati, testirati i puštati u rad sukcesivno najkasnije u roku od 60 dana od dana potpisivanja Ugovora u prostorije Kupca, koje su nalaze na adresi: ul. Fehima efendije Čurčića broj 1., Sarajevo.

Član 6.

Ugovoreni rok isporuke robe iz člana 5. ovog Ugovora, može se produžiti u slučaju:

- nastanka više sile ili drugih okolnosti koje Prodavac nije mogao predvidjeti,
- kada ugovorne strane sporazumno produže ugovorni rok.

Član 7.

Ukoliko Prodavac svoje obaveze, zbog dejstva više sile ili nastanka nepredviđenih okolnosti, ne može ispuniti u periodu od 60 dana, Kupac ima pravo na raskid Ugovora.

VI KVALITET ROBE

Član 8.

Prodavac se obavezuje da isporučena roba iz člana 1. ovog Ugovora, bude traženog kvaliteta i karakteristika, odnosno kvaliteta i karakteristika koji je dao u svojoj Ponudi, br. 1507/17 od 11.09.2017. godine, a koju je Kupac odabrao kao najpovoljniju.

Kvalitet i karakteristika robe koja je predmet ovog Ugovora, kontrolisat će ovlašteni predstavnici Prodavca i Kupca.

Primopredaju robe između Prodavca i Kupca izvršit će ovlašteni predstavnici Prodavca i Kupca.

O navedenoj primopredaji robe sačinjit će se Zapisnik o primopredaji, odmah, a najkasnije u roku od 24 sata, od prijema, montaže, instalacije, testiranja i puštanja u rad cjelokupne robe, koji će potpisati ovlašteni predstavnici Prodavca i Kupca.

Član 9.

Sva eventualna odstupanja i nedostaci, prilikom primopredaje robe, konstatovat će se Zapisnikom o primopredaji robe.

Prodavac se obavezuje da će primjedbe konstatovane Zapisnikom o primopredaji otkloniti, o svom trošku, odmah, a najkasnije u roku od 15 dana, od dana potpisivanja navedenog Zapisnika.

Ako u navedenom roku Prodavac ne otkloni primjedbe konstatovane Zapisnikom o primopredaji robe, Kupac zadržava pravo da raskine Ugovor.

VII OBAVEZE PRODAVCA I KUPCA

Član 10.

Prodavac se obavezuje:

- da će ugovorene obaveze izvršiti blagovremeno, u ugovorenom roku, stručno i kvalitetno u skladu sa važećim tehničkim normativima i standardima, sve prema dostavljenoj Ponudi;
- da će odrediti stručna lica koja će rukovoditi izvršenjem poslova montaže, instaliranja, testiranja i puštanja u rad roba, kao i stručna lica koja će izvršiti obuku osoblja Kupca za rad na montiranoj i instaliranoj robi;
- da će Kupcu omogućiti nadzor nad vršenjem isporuke, montaže, instalacije, testiranja i puštanja u rad roba, te da će na njegov zahtjev obustavi isporuku, instalaciju, testiranje i puštanje u rad roba ukoliko se utvrdi da se iste izvode nekvalitetno i mimo tehničke dokumentacije;
- da će snositi odgovornost za štetu u toku izvršenja ugovora nastalu radnicima Prodavca ili trećim licima,
- da će posebno obrati pažnju da prilikom isporuke, montaže, instalacije, testiranja i puštanja u rad roba, ne nanese štetu unutar prostora ili susjednih prostora, a ukoliko se ista desi, da će je otkloni o vlastitom trošku;
- da će u toku isporuke, montaže, instalacije, testiranja i puštanja u rad roba, kao i po završetku cjelokupnog posla iz prostorija gdje je vršena montaža, instalacija, testiranje i puštanje u rad roba ukloniti sav višak materijala i opreme, te da će iste očistiti;
- da će u najkraćem roku otkloniti eventualne nedostatke koji mu budu predočeni prilikom primopredaje roba iz člana 1. ovog Ugovora od strane ovlaštenog lica Kupca;
- da će prilikom primopredaje roba iz člana 1. ovog Ugovora, Kupcu predati uputstva za rad na montiranoj i instaliranoj robi, koja moraju biti napisani na jednom od službenih jezika u Bosni i Hercegovini, kao i svu potrebnu prateću dokumentaciju za istu i to: garantne listove za ponuđenu robu iz tehničke specifikacije, certifikate o kvalitetu isporučene robe, ateste, licence i drugu tehničku dokumentaciju.

Član 11.

Kupac se obavezuje:

- da će osloboditi prostorije u kojim će se montirati i instalirati roba u maksimalno mogućoj mjeri;
- da će izvršiti uplatu ukupne cijene vrijednosti ugovorene robe iz člana 3. ovog Ugovora, na način i u roku utvrđenom u članu 4. ovog Ugovora;
- da će pismeno obavijestiti Prodavca o svakom eventualnom propustu Prodavca u odnosu na pitanja utvrđena ovim Ugovorom.

VIII GARANTNI ROK

Član 12.

Za isporučenu i montiranu robu važi garancije proizvođača robe, s tim što je Prodavac dužan da svu dokumentaciju o garancijama proizvođača robe, pribavi i preda Kupcu, zajedno sa uputstvima za njihovu upotrebu.

Garanti rok teče od dana kompletne isporuke i montaže robe.

Član 13.

Prodavac snosi odgovornost za sve manjkavosti, odnosno nedostatke vezano za isporučenu robu, koje se mogu javiti ili nastati tokom garantnog perioda, pod uslovom da se robe koriste i održavaju u skladu sa uputstvima za njihovu upotrebu i sa preporukama Prodavca.

Prodavac se obavezuje da će u toku garantnog perioda, na osnovu pismenog ili usmenog zahtjeva Kupca, o svom trošku poduzeti mjere popravke, zamjene ili će na drugi način otkloniti uočene nedostatke na robi i to u vremenskom odzivu maksimalno 24 sata od vremena prijave kvara od strane ovlaštenih lica Kupca.

Ukoliko se Prodavac ne odazove i ne otkloni nedostatke ili ne izvrši zamjenu u rokovima utvrđenim u stavu 3. ovog člana, Naručilac stiče pravo da za otklanjanje nedostataka ili za izvršavanje zamjena angažuje drugog izvođača i da nastalim troškovima tereti Izvođača.

IX UGOVORNA KAZNA I RASKID UGOVORA

Član 14.

Ukoliko Prodavac ne izvrši svoje obaveze u ugovorenom roku, dužan je da, Kupcu za svaki dan zakašnjenja plati ugovornu kaznu u iznosu od 0,3% od ukupne vrijednosti ugovora bez PDV-a.

Ukupna vrijednost ugovorne kazne koja se plaća ne može iznositi više od 10% od ukupne vrijednosti Ugovora.

Član 15.

Ukoliko isporuka kasni duže od 60 dana, Kupac zadržava pravo jednostranog raskida Ugovora.

Razlog za raskid Ugovora može biti stečaj, likvidacija ili drugi oblik prestanka postojanja Prodavca ili više sile.

Član 16.

Ugovorne strane su dužne u roku od sedam dana obavijestiti drugu stranu o nastupanju razloga zbog kojih se ne može realizovati ovaj Ugovor.

X PRIJELAZNE I ZAVRŠNE ODREDBE

Član 17.

Na sva pitanja koja nisu regulisana ovim Ugovorom, a pojave se prilikom njegove realizacije primjenjivat će se odgovarajuće odredbe Zakona o obligacionim odnosima.

Član 18.

Ugovorne strane su saglasne da će sve nesuglasice i sporove, koji eventualno mogu da proisteknu iz ovog Ugovora, prvenstveno nastojati riješiti sporazumno, a ukoliko, iz ma kog razloga, to ne budu moguće, nadležan je Općinski sud u Sarajevu.

Član 19.

Ovaj Ugovor stupa na snagu danom njegovog potpisivanja od strane ovlaštenih predstavnika Prodavca i Kupca, i isti će se primjenjivati do izvršenja svih pojedinačnih obaveza predviđenih ovim Ugovorom.

Član 20.

Ugovor je sačinjen u 6 (šest) istovjetnih primjerka, od kojih svaka od ugovornih strana zadržava po 3 (tri) potpisana i ovjerena primjerka.

ZA IZVŠIOCA
Direktor



Broj: 228-17
Sarajevo, 27.09.2017. godine

ZA NARUČIOCA
Direktor

mr. Mustafa Kovač

M.P.

Broj: 22-44-1392-12/17
Sarajevo, 27.09.2017. godine